



KENYATAAN MEDIA

PEMBENIHAN AWAN ATASI KEMELUT BEKALAN AIR SEKTOR PERTANIAN DI KELANTAN

Fenomena kemarau yang berlarutan melanda negara sejak lebih sebulan lalu telah menyebabkan lebih 7,440 hektar kawasan tanaman padi yang diusahakan oleh 2,555 petani di bawah kendalian Lembaga Kemajuan Pertanian Kemubu (KADA) di Kelantan terjejas teruk.

Bagi mengatasi masalah bekalan air yang berlaku akibat cuaca panas yang melampau ini, KADA melalui Kementerian Pertanian dan Industri Asas Tani (MOA) telah mengambil langkah segera dengan membuat sistem penggiliran bekalan air ke petak sawah mengikut tempoh tertentu dan keperluan sebagaimana yang telah ditetapkan setiap kawasan tanaman padi di bawah seliaan agensi tersebut.

Sebanyak 4 unit pam sokongan dan satu unit *floating pump* juga telah dibekalkan oleh KADA bagi menampung keperluan air selain mengagihkan 242 unit pam bergerak dan 212 unit *backward pump* di setiap jajahan serta bekalan diesel turut diberikan kepada petani untuk menggerakkan pam-pam yang disediakan dan pam persendirian.

Namun dengan situasi kemarau yang berterusan ini, maka saya telah mengarahkan pihak MOA agar mengadakan perbincangan dengan Jabatan Meteorologi bagi melaksanakan operasi pemberian awan sebagai tindakan lanjut bagi menangani isu ini.

Hasil perbincangan yang dibuat bersama pihak Jabatan Meteorologi, saya dimaklumkan bahawa keputusan telah dibuat untuk meneruskan operasi pemberian awan menggunakan peruntukan bersama Jabatan Meteorologi dan MOA. Pihak Jabatan Meteorologi akan melaksanakan operasi tersebut secepat mungkin mengikut penentuan masa dan keadaan yang sesuai.

Sekiranya kemelut bekalan air ini berterusan, lebih ramai petani akan terjejas dan jumlah kawasan terlibat juga akan meningkat maka atas sebab inilah pihak Kementerian sedang berusaha untuk mengatasi masalah ini dengan apa juar cara sekalipun bagi memastikan petani terus dibela.

**YB DATO' SALAHUDDIN AYUB
MENTERI PERTANIAN DAN INDUSTRI ASAS TANI
23 MAC 2019**

#####